

Uunga siunnersuut: GeoSurvey Greenland pillugu Inatsisartut inatsisaat nr. xx. yy. 2014-imeersoq**Kapitali 1***Suliassat*

§ 1. GeoSurvey Greenland (GSG) tassaavoq Naalakkersuisut ataanni nunami namminermi ujarassiornikkut, ilisimatusarnikkut, ilisimasanut aamma paasissutissanut nalunaarsukkanut sullissivik.

§ 2. GSG Kalaallit Nunaanni nunavittami sumiiffiit tassunga atasut ilanngullugit ujarassiornikkut pissutsini ilisimatusarnikkut misissuinermit akisussaasuvoq.

Imm. 2. GSG pissutsit Kalaallit Nunaata ujarassiornikkut pinngortitami pisuussusiinik piiaanermit allanngutsaaliuinernullu pingaaruteqartut pillugit ilisimatusarnermik ingerlatsissaaq. GSG aamma pissutsit taaneqartut pillugit nunap assiliornermik, alapernaarsuinermik, paasissutissanik nalunaarsukkanik katersinermik, paasissutissanik aqutsinermik aamma paasissutissiisarnermik suliaqassaaq.

Imm. 3. GSG-ip ilisimatusarnermik ataqatigiissarineq aamma sullissivinnit misissuinermit ilisimatusarnernillu paasisanik nalunaarsuineq, pissutsinut imm. 2-imi taaneqartunut pingaaruteqartut isumagissavai.

Imm. 4. GSG-ip nunat tamat akornanni pisussaaffiit GSG-ip ilisimatusarnermit suliassa qarfiata iluani Kalaallit Nunaannit pisussaaffigineqartut isumagissavai.

Imm. 5. GSG Naalakkersuisunut attuumassuteqanngitsumik inissisimavoq aammalu taamaallaat § 3, imm. 1-2 malillugit oqartussaasut suliassaannik isumaginninnermini Naalakkersuisunit ilitersorneqartussaataalluni. GSG ilisimatusarnermi aamma periaatsinik atuinermi kiffaanngissuseqartumik inissisimalluni aammalu tamanna illersugarissallugu.

§ 3. GSG pinngortitamut, avatangiisinut, nukissiornermut aamma aatsitassarsiornermut apeqqutini Naalakkersuisunut ujarassiornikkut siunnersuissaaq, aammalu suliassa qarfiit taakkua iluanni oqartussaasut suliassaannik suliarinninnermut tunngatillugu siunnersuissalluni.

Imm. 2. GSG nunami namminermi ujarassiornikkut paasissutissatigut nalunaarsukkanik katersiviusoq aammalu taamatut atuunnermini paasissutissatigut nalunaarsukkanik ilisimasanillu oqartussaasunut, ilinniarfinnut, suliffeqarfinnut aamma inuinnarnut il.il. atugassiisassalluni.

Imm. 3. GSG aningaasartuutitut tassunga atasunik tamakkiisumik ilaannaasumilluunniit

matussusiisitsilluni, pisortanit aamma kattuffinnit namminersortunit imaluunniit suliffeqarfinnit suliakkiissutinik suliaqarsinnaavoq.

§ 4. GSG Namminersorlutik Oqartussat aatsitassanut suliaasaqarfimmik isumaginninnerannut atugassanik suliniutit, siunnersuineq aamma piginnaasaqarnernik paarlaasseqatigiittarnissaq pillugu suleqatigiinnissamut ujarassiornikkut misissuisarfinnut aamma ilisimatusarnermut sullissivinnut allanut isumaqatigiissuteqarsinnaavoq.

§ 5. GSG suliaasaqarfimmini pingaarnerit iluanni ilisimatusarfinni il.il. bacheloritut, kandidatitut aamma ph.d.-tut ilinniartitaanernut ilisimasatigut tapersiisinnaavoq. Taakkua erseqqinnerusumik annertussusissaat aningaasalersorneqarnerallu GSG-ip aamma ilinniarfiit ataasiakkaat akornanni isumaqatigiissummi aalajangersarneqassaaq.

Kapitali 2

Aqutsinermut aalajangersakkat

§ 6. GSG GSG-ip aaqqissuussaananeranut, piffissamut ungasissumut suliaqarnissaanut aamma inerisaanissamut nalinginnaasumik malittarisassanik aalajangersaasussanit siulersuisunit aqunneqarpoq. Siulersuisut sullissiviup aningaasaataanik, taakkua sullissiviup siunertaanut annertunerpaamik iluaqutaasussanngorlugit aqutsissapput.

Imm. 2. Siulersuisut GSG-ip missingersuutai naatsorsuutaalu akuerisassavaat.

Imm. 3. Siulersuisut ilisimatusarnerup GSG-imi ingerlanneqartup pitsaassusia qulakkiissavaat.

§ 7. Siulersuisut siulittaasoqarput aammalu allanik 6-it tikillugit ilaasortaqlutik, ukiut 4-ikkaartut tikillugit toqqarneqartartussanik.

Imm. 2. Siulersuisut siulittaasuat aamma ilaasortat 3-it Naalackersuisunit inuttut piginnaaneqarnerat malillugu toqqarneqassapput. Taakkua ilisimatusarnermut inuussutissarsiornermullu ilisimasaqartuussapput aammalu Naalackersuisunit attuumassuteqassanatik aamma ilaasortat marluk GSG-ip suliaasaqarfiisa pingaarnerit iluanni ilisimatuujussallutik ataqqineqarlutik akuerisaasut. Ilaasortaq ataaseq Ilisimatusarfinnit inassuteqarneq malillugu toqqarneqassaaq aammalu ilaasortaq ataaseq GEUS-imit inassuteqarneq malillugu toqqarneqassalluni. Siulersuisuni siulittaasoq pisortat imaluunniit namminersortut suliffeqarfiinit aqutsisutut misilittagaqartuussaaq aammalu ilisimatusarnermik ilisimasaqartuussalluni.

Imm. 3. Ilaasortat marluk GSG-imi sulisut akornanni toqqaannartumik toqqaanikkut toqqarneqassapput.

§ 8. GSG-ip ulluinnarni aqutsisui aamma sulisunik aqutsinera pisortamit isumagineqassaaq. Pisortaq GSG-p avammut sinniisorissavaa. Pisortaq aqutsinermik misilittagaqartuussaaq aammalu minnerpaamik GSG-ip suliassa qarfiisa iluanni ilisimatusarnermi ilisimasaqartuussalluni.

Imm. 2. Siulersuisut pisortamik atorfinitsitsisartuupput soraarsitsisartuullutillu. Pisortap malittarisassat innersuussutillu siulersuisut aalajangigaat malissavai.

§ 9. Siulersuisut GSG-mut malittarisassanik GSG-ip suliaqarneranut aqutsisuinullu erseqqinnerusunik maleruagassanik imaqartunik suliaqassaaq.

Imm. 2. Malittarisassat aamma malittarisassanut allannguutit Naalakkersuisunit akuerineqartassapput.

Kapitali 3

Tamanut saqqummiussisarneq aamma naliliisarneq

§ 10. GSG-ip immikkut mianerisassat, ilanngullugit inuiaqatigiinni mianerisassat aamma suliffeqarfiit ilisimatusarnermit paasisanik atorluaanissamut periarfissaqarneranni mianerisassat, tamanut ammasumik saqqummiisoqartariaqannginneranik malitseqartussaasimangippata, ilisimatusarnermit paasisani tamanut saqqummiuttassavai.

Kapitali 4

Aningaasalersuineq il.il.

§ 11. GSG-ip suliassaasa ingerlanneqarnissaannut ukiumoortumik aningaasanut inatsit aqutugalugu aningaasanik atugassiisoqartassaaq.

Imm. 2. GSG pisortat oqartussaanut allanit aningaasanik pissarsisinnaavoq.

Imm. 3. GSG aningaasaliissutinut inatsisit saniatigut tapiissutinik tunissutinillu pissarsisinnaavoq.

Imm. 4. GSG isertitanit matussuserneqartumik suliaqarnermik aammalu ingerlatanik tapiissutinik aningaasalersorneqartumik ingerlatsisinnaavoq.

Imm. 5. Imm. 2-imi, 3-imi aamma 4-imi taaneqartutut suliassanut inatsisitigut pisussaaffiliiffiunngitsunut avataaniit aningaasalersuineq GSG-imit kiffaanngissuseqartumik aalajangiiffiqarsinnaavoq.

§ 12. Missingersuutit, naatsorsuuserineq aamma naatsorsuutinik saqqummiussisarneq pillugu Namminersorlutik Oqartussanut aalajangersakkat qaqugukkulluunniit atuuttut GSG-ip malissavai.

Imm. 2. Naatsorsuutit aningaasanut inatsimmi aningasaliissutit atorneqarnerannut immikkut naatsorsuutinik imaqassapput.

Imm. 3. Ukiumoortumik naatsorsuutit Namminersorlutik Oqartussat kukkunersiuisartuinit kukkunersiorneqassapput.

Imm. 4. Siulersuisut ukiut tamaasa marts naatinnagu ukiumoortumik nalunaarusiamik ukiumoortumik naatsorsuutininik aamma kukkunersiuinermut allattuiffimmik ilaqartumik Naalakkersuisunut nassiussisassapput. Ukiumoortumik nalunaarusiap akuersissuteqarfigineqareernerata kingorna Naalakkersuisut taanna Inatsisartunut ilisimatitsissutitut nassiutissavaat.

Kapitali 5.

Atuutilerpera

§ 13. Inatsisartut inatsisaat ulloq 1. januar 2016 atuutilerpoq.

Namminersorlutik Oqartussat, ulloq xx.xx.2014

Aleqa Hammond